

Date – 01/03/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Kristian Thalai Pawl (KTP) General Conference vawi 61-na, Saitual Public Playground, Saitual-a nghah chu zanin hian a tiak ang.
2. Myanmar raltlan Mizorama awmte an mitnaute leh kutze thla hmanga chhinchhiaha kalpui chu za zela 97 chuang zawh fel a ni tawh.
3. Naktuk chawhma dar 10 leh a chanve atanga Assembly Budget session chhunzawmin a tlangpui a Budget sawihona hun hman a ni ang.
4. Israel leh United States-ten boruak atanga Iran an beihnaah an ram hruaitu lu ber, Ayatollah Ali Khamenei a thi.



KTP GEN. CONFERENCE

Mizorama Thalai Inkhawmpui lian ber Kristian Thalai Pawl (KTP) General Conference vawi 61-na, Saitual Public Playground, Saitual-a nghah chu Ningani atang khan tan a ni a, zanin hian a tiak ang.

General Conference thupui atan 'Pathian tana mi hlang' (sam 119:1-3) tih hman ani a ,Speaker chu Rev. P.C. Lalropuia a ni. Inkhawmpui tan zan kha Palai lawmna hun atana hmangin Synod Secretary Rev. B. Zohmangaiha'n KTP kumpuan thupui 'Chhungril takna (Sam 51:6)' tih chu Pathian hnenah hlanin a tlangzarh a, Rev. John Raldosanga, Synod Moderator hnen atangin Pathian thuchah ngaihthlak a ni. Zirtawpni chawhmaah Rawngbawlna Report inkhawm neih a ni a, chawhnuah Variety Programme-in hun hman a ni a, zan Pathian biak inkhawmah Executive Secretary i/c KTP Rev. Dr. Rosiamliana Tochwawng-in Pathian thuchah a sawi a. Nimin chawhma khan Saitual Kohhran Biak Inah Rorel Inkhawm a awm a, rorel hlan hian Pandal-ah Variety Programme a awm a, zan inkhawmah Speaker hnen atangin Pathian thuchah ngaihthlak a ni a, Zan inkhawm banah concert hmanga inkhawm chhunzawm a ni.

Vawiin chawhma leh chawhnu inkhawmah Speaker hnen atangin Pathian thuchah ngaihthlak leh a ni a, zanah Central KTP Leader kal chhuak tur, Rev. H, Lalawmpuia'n Pathian thuchah a sawi ang a, kum 2026 - 2028 chhunga CKTP

hruaitu thar hlanna neih a ni bawk ang. Zan inkhawm banah Fakna Inkhawm neih chhonzawmin inkhawmpui hi a tiak dawn a ni.

Nikuma KTP inchiarna a a lan dan chuan bial 218, branch 917 awmin branch 865 chu Mizoram chhung ami a ni a, branch 52 chu Mizoram pawn ami a ni a. KTP member hi nuai 1, sing 8, sang 1 leh 131 an awm a, an zinga nuai 1, sang 9 leh 456 chu mipa an ni a, hmeichhia 71,675 an awm bawk. Nikum chhung khan KTP member 569 an thi a, an zinga 502 chu mipa niin hmeichhe thi zat hi 67 an ni a, member thi awm lohna bial 50 an awm. Nikum chhung vek khan KTP member nupui/pasal nei 3,435 an awm a, an zinga 1,610 (za zela 46 point 87) chu biakina innei an ni a, hmun danga innei 1,825 (za zela 53 point 13) an awm bawk a ni.

Saituala KTP General Conference hman mekah hian Reception duty te chhinchhiahna hnunung berah vawiin chawhma thleng khan palai 47,039 an chhinchhiah tawh. Vawiin chawhma inkhawmah khan mi 59,000 bawr vel inkhawma ngaih a nih thu KTP General Secretary thupuanah tarlan a ni a. Reception lam hotute chuan hmun dang atanga Saitual inkhawmpui palai lut zat hi mi sing 5 chuang fe an nih an rin tawh thu an sawi a. An chhinchhiahnaa mi 47,000 chuang hret chu portal system-a chhinchhiah vek a nih avangin dik tura ngaih a nih thu an sawi a. Hetihruah hian palai in report lo an thahnem hle tih an sawi a ni. Lirthei thleng tawh zat hi 10,636 a ni bawk.

Nimin nileng khan Saitual Kohhran Biak Inah CKTP Leader Rev H. Lalawmpuia hovin ro rel ani . Thurel zingah Synod Charity Fund atan tum khat inkhawm thawhlawm lakkhawm te, Youth Recreation Centre puala tum khat inkhawm thawhlawm lakkhawm te, Central KTP in ruihhlo do kawngah chak zawka hma lakte, Street Ministry neih leh rawtna te, General Conference thlengtu puihna Bial tina Special budget siam rawtna te pawm a ni a. Kum 2030 KTP Gen Conference chu Zawlnuam leh Bawrai Pastor Bial ten an inthlen tum dawn a, a hun atan February ni 28 leh March ni 3, 2030 a ni ang.

Vawiin Pathianni hian CM Pu Lalduhoma bakah Bialtu MLA Prof. Lalnilawma, Dr. Vanlalhlana leh Pu Lalnghinglova Hmar ten Conference hi an chhim a ni.

(Desk/Corr: Dr. Ruata/PTC, Saitual)

<><><>

ECM

Evangelical Church of Maraland (ECM) Assembly rorel inkhawmpui vawi 103-na Tipa Salem Biak Ina ngah chu zaninah a tiak ang.

He Inkhawmpui-ah hian ECM Assembly 2026-2029 hruaitu tur thlanna ah, Moderator atan Rev F. Vanlaldika chu thlan a ni a, Senior Executive Secretary atan Rev K. Laichhua Azyu; Executive Secretary i/c Mission atan Rev Khabi Chozah; Executive Secretary i/c Education atan Rev Chhuakhu Khithie; Executive Secretary i/c Social Mission and Development atan Rev A.Z. Beirakaw te thlan an nih bakah, Pro Pastor 4 te chu he Assembly ah hian Pastor puitling a nemngheh an ni bawk.

Assembly ah hian Agenda 177 lut zingah agenda 77 chu pawm a ni a, Agape Home Building sakna tur cheng nuai 248 dah ni se tih te, ECM Guest House, Saikao (Missionary te phumna khua) ah sak ni se tih te a tel a ni.

(Corr: nuteii)



BIOMETRIC ENROLMENT

Myanmar raltlan Mizorama awmte an mitnaute leh kutze thla hmanga chhinchhiaha kalpui chu za zela 97 chuang zawh fel a ni tawh.

Home department atanga thu dawn danin Myanmar raltlan Mizorama awm mek mi 28,355 zinga mi 27,574 te chu an mitnaute leh kutze thla hmanga chhinchhiaha an ni tawh a, chhin chhiaha tawhte hi za zela 97 point 25 a tling tawh ani. Myanmar raltlan awm tamna ber Champhai district bakah Aizawl, Lunglei leh Serchhip district-ah te chuan biometric enrolment hi zawh fel a ni tawh a. Raltlan awm tamna ber dawttu Lawngtlai district-ah pawh za zel a 96 point 74 zawh fel a ni tawh ani. Lawngtlai district-ah hian Myanmar raltlan 5,034 an awm mek a, an zinga mi 4,870 te chu chhinchhiaha a ziahluh an ni tawh. He tih lai hian district dang, Kolasib, Saitual, Mamit, Hnahthial, Khawzawl leh Siaha district-ah te chuan kuminah biometric enrolment hi an chhinzawm hauh lo niin a lang a. Home department hotute chuan a chhan an hriat bik loh thu Akashvani News, Aizawl an hrilh ani.

Mizoramah hian Bangladesh atanga raltlan mi 2,360 an awm mek bawk a, Lawngtlai district-ah tam berin mi 2,042 an awm a, Serchhip district-ah 235, Lunglei district-ah 76 leh Aizawl district-ah 7 an awm bawk. Serchhip, Lunglei leh Aizawl district-a Bangladesh raltlan awmte hi biometric enrolment tih zawh vek a ni tawh na a, Lawngtlai district a mi 2,042 zinga 183 chauh chhinchhiaha an la nih avangin Mizorama Bangladesh raltlan chhinchhiaha zat hi za zela 21 point 23 chauh a la ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



ASSEMBLY SESSION

Naktuk chawhma dar 10 leh a chanve atanga Assembly Budget session chhinzawm turah a tlangpui a Budget sawihona hun hman a ni ang.

Naktuk Assembly inkhawmah hian zawhna leh chhanna hun hman a ni ang a. Chumi zawhah Chief Minister Pu Lalduhoma'n Comptroller & Auditor General of India (CAG)-in Mizoram sorkar chungchanga report a siam pathum - Finance Accounts 2024 – 25 Volume I leh Volume II bakah Appropriation Accounts 2024 – 25 te chu House dawhkanah a dah ang a. Tourism Minister Pu Lalnghinglova Hmar-in The Mizoram (Registration of Tourist Trade) (Amendment) Rules, 2026 leh Guidelines for Tour Guides in Mizoram (Amendment) te chu House dawhkanah a dah bawk ang a. Hemi hnu hian tangka kum thar (2026-2027) Budget a tlangpui a sawihona tan a ni ang a, sawihona hi Thawhlejni khian zawhfel hman tum a ni dawn a ni.



WAR AGAINST DRUGS

Central YMA President Pu R. Lalnggheta chuan ruihhlo zuartute chu dim loh tur a ni a, an sumleh pai, an neih te pawh it loh tur a ni, ati.

He thu hi Lengpui YMA buatsaih YMA kumpuan 'Ruihhlo Do' hawna-ah sawiin, ruihhlo zuartute chu thalai hrai hlumtu, chhungkua ti thendarh a, chhungkua ti hrehawm tu ruihhlo zuartute chu ngaihsan loh tur an ni a ti. Ruihhlo ngaite erawh chuan suamhmang an tawh a, anni ho hi enkawl a, bualfai a eitur pe turin mitin tanrual a ngaih thu a sawi a, an tan hian rawngbawltute hian ke an pen ve tawh em tih a zawt a ni. CYMA President chuan YMA hruaitute chu an kut a fai a ngaih thusawiin, hluihlawn thil la lo turin YMA hruaitute chu a ngen a, tunlaiin ganja a tamthu sawiin, naupang tete in an ti a, hei hian a aia tha lo a hring chhuak dawn a, ram hi chhan theihin, chhan tlak in a la awm a, kohhran leh YMA-te tangho a theihtawp chhuan tlang turin kal khawmte chu a chah a ni.



IRAN'S SUPREME LEADER KILLED

Israel leh United States-ten boruak atanga Iran an beihnaah an ram hruaitu lu ber, Ayatollah Ali Khamenei bakah Defence Minister leh Chief of army staff-te an thi. Iranian state media chuan US leh Israel indo thlawhna-ten Iran sipai leh sorkar hmun pawimawhte an bomb naah Khamenei hi a thi tih tukin khan a puang a, Iran ramah ni 40 chhung sun a nih tur thu a sawi bawh.

US leh Israel sipai-ten Iran defense council thutkhawm neih lai an beihnaah Iran sipai hotu lu ber, General Abdol Rahim-a leh Defense Minister, General Aziz Nasirzadeh-a te bakah Iran paramilitary Revolutionary Guard leh Security Adviser, Ali Shamkhani-a pawh a thi tih Iranian state media chuan a sawi a, he beihna thlengah hian mi 200 chuang an thih bakah midang 700 chuangin hliam an tuar niin a sawi bawh. Report thenkhatah chuan Iran sorkara mipawimawh 40 an thi nia sawi a ni.

Iran hian West Asia-a Dubai, Doha, Bahrain leh Kuwait-a US sipai hmunte a kap nia sawi a ni a, Israel pawh missile-in vawi engemawzat a kap tawh a ni.

US President Donald Trump-a chuan Khamenei-a thihna chu Iran mipuite tana an ram lak let theihna hun tha a nih thu, social media-ah a tarlang a, Iran-in an ram hruaitu lu ber, Ayatollah Khamenei-a phuba lak nan US leh Israel lakah na taka chet a tum thu a sawi chu Truth Social-ah chhang letin Donald Trump-a chuan Iran-in chet a lak vaih chuan an la hriat ngai lohva na-in US-in a bei let nghal ang, a ti.

